



Nachtschwärmer 2010

D'Schwoobe händ kirzlig d'Korgge lo knalle
Vor 20 Joor isch d'Muure gfalle
Byy uns wär d'Fraid jo au gaar grooss
Wääre mir ändlig unsere Muurer los

Frau ka ebbis besser, das muesch ne loo
Mir gääbe's jo zue, es isch esoo
Zwai Sache glyychzytig, isch fir uns kompliziert
Ändlig het das au dr Vasella kappiert

Orangschehut het jeedi Frau
Celulitis nennt me das schiints au
Männer händ's nid, die kemme druss
Dr Grund isch, s'gseet aifach scheisse uss

Em Woods het's bim Golfe nimm so gfalle
Vyyl lieber dryybt äär's mit syyne Schnalle
Äär vernuudlet die Gritte, noch und nöcher
E Golfplatz het halt numme 18 Löcher

Dr Blatter ka das nid verstoo
D'FIFA wott wägg vo Ziiri goo
Uns goot das aifach nid in Grind
Wiesoo si jee nach Ziiri sind

Kirzlig sind mir ab in d'Stadt
Go Kätzli risse, das isch glatt
Mit Fraue isch zwar gaar nid gloffe
Derfir hämmer dr Hirschmann niene droffe

Dass Migrante kenne immigriere
Isch Bedingig, dass si Ditsch studiere
D'Schwoobe saage: kann ich, mach ich gerne
Aber die mien denn rätho-romanisch lerne

Dr Phaabscht verzellt grad d'Wiehnachtsgschicht
Do gumpt iim e Maitli zmitts ins Gsicht
Do sait dr Phaabscht zu däm stiirmische Liisi
Hey, slow down, take it easy

So schnäll wie dr Béglé isch koo
Muess är au scho wiider goo
Kum ewägg, kunnt dr Hasler, ganz unbefange
So schnäll isch by dr Boscht no nie ebbis gange

Bim Bush het dr Schueh dr Grind nid droffe
Bi dr Leuthardt, und em Stiifel, isch es äänlig gloffe
Bim Berlusconi isch dr Doom nid nääbe duure
Isch au nid meeglig, bi dääre groosse Schnuure

Schugger wärde ka nid so schweer sii
Do git's baar Teschts, halt so diveersi
Schlussändlig nämme si jeede Maa
Wo Pornos aabelaade kaa

Si wänd e neiy SVP grinde
Ganz speziell fir warmi Frinde
Gits die emol, mir wärdes gseh
Isch kain me bii dr alte SVP

Dr Blocher het kirzlig informiert
E Stigg vo syym Darm isch amputiert
Statt vom Diggdarm, s'isch unbestritte
Händs doch e Stigg Hirni uusegschnitte

Bi dr Operation händ d'Chirurge afo flueche
Si händ zeerscht mol miesse s'Hiirni sueche

www.nachtschwaermer.ch

Wottsch au by uns bänggle?

Schigg doch aifach e Brief in unser Boschtfach

VSG Postfach 4365 4002 Basel

Oder goosch uff: www.vsg-basel.ch

Drugg: Discount Print H. Leidenfrost AG Basel